

28. april 2015

Inatsisartut aamma Inatsisartut allaffeqarfianni aningaasartuutit tamanit takuneqarsinnaanngornissaat kiisalu kialuunniit paasiniaasinnaanngornissaa anguniarlugu Inatsisartut Sule-riaasiata allannngortinnissaanut Inatsisartut Siulittaasoqarfia saqqummiusseqqullugu peqquneqarnissaanik Inatsisartut aalajangiiffigisassaattut siunnersuut.

(inatsisartuni ilaasortaq Randi vestergaard Evaldsen, Demokraatit)

Inatsisartuni Ilaasortap Randi Vestergaard Evaldsen, Demokraatit siunnersuutaanut Siumumiit imatut oqaaseqassaagut.

Innuttaasut sinnerlugit Naalackersuinikkut Inatsisartoqarnermilu akisussaaffiit agguataarneqarsimapput, aammalu aalajangikkat sanioqqutaarneqannginnissaanut Namminersorluni Oqartussani malitassanik aalajangersagaqarpoq, tamatumani qulakkeerumallugu ingerlatsinermi sinaakkusiusat sanioqqunnagit malinneqarnissaat.

Qinersisartunit toqqakkatut suliaqartitaanermi akisussaaffilersuisoqartarpoq Inatsisit atuuttut mali-llugit, taamaattumik Siumumi qularinngilarput aqutsinerit akisussaasuseqartumik ingerlanneqar-tarmata.

Siunnersuuteqartup anguniarpaa pisortat ingerlatsinerat pillugu paasitinneqarsinnaatitaanermut Inatsimmut Inatsisartut Inatsisartullu Allattoqarfiat ilangunneqassasut, soorunami ingerlatsineq ammasoq Siumumi aamma sapinngisaq naapertorlugu anguniarneqassasoq isumaqarpugut.

Siumup pingaartippaa pisortani ingerlatsineq isumannaatsumik ammasumillu pissasoq, taamaat-tumillu siunnersuuteqartup tunngaviusumik isumaa akерleringilarput. Siumumi isumaqarpugut Inatsisartoqarfimmi aningaasatigut atuisarneq pillugu Inatsisartut ukiumoortumik nalunaarutaatigut paasissutissat amerlasuut pigineqartut, assersuutigalugu Inatsisartut Ataatsimiititaliaanni aningaa-sartuutit annertussusaat ukiut tamaasa Ukiumoortumik Nalunaarutitigut atuarneqasinnaasarlutik. Soorluttaaq Inatsisartoqarfimmi aningaasartuutit allat assgiinngitsut, ilaatigut, sulisut ataatsimut ukiumoortumik aningaasarsiaanut atorneqartartut, ilassinissutinut aningaasartuutit, allaffimmi atorussasnut aningaasartuutit atuarneqasinnaasut. Inatsisartoqarfik tamakkiisoq eqqarsaatigalugu 35,7 mio. Kr.-it 2013-imi atorneqasimapput.

Siunnersuutip akuerineqarnerani eqqarsaatigisariqartut arlaqarput, ilaatigut siunnersuutip akuerine-qareerluni inassutip atuutilersinnerqarnerani suliasatigut malitsigisassai: sulisutigut qanoq annertu-tigisumik pisariaqartitsinermik malitseqassava, taassumallu kinguneranik aningaasartuutit qanoq qaffatsigissappat paasineqarpat siunnersuutip akuerineqarnera sulisut amerlisariaqalerneranik malitseqartariaqartoq?

Assersuutigalugu nittartagalerisunik, nutserisunik, allaffissornermi ilinniarsimasunik allanillu inatsisip malitsigisaanik atorfinitsitsisoqartariaqalernerata kinguneranik aningaasartuutisat nutaat pilersitassat qanoq aningaasalersorneqassappat?

Mianerisassat allat tassaasinnaapput, inuit ataasiakkaat pillugit paasissutissat mianernarsinnaasut takunnissinnaatitaanermik periarfissiineri qanoq kalluarneqartigissappat?

Ammasumik suleriuseqarneq soorunami Inatsisartut aamma sulineranni atuuppoq, Inatsisartuni ataatsimiinnerannit paasissutisat Inatsisartut nittartagaatigut atuarneqarsinnaasarput.

Inatsisartut inatsisit iluanni periarfissat naapertorlugit ammasumik ingerlatsinissaat ilisimavarput, mianerisassaqaqtulli ataasiakkaarluta ilisimalluinarpavut. Siunnersuutilli itigartinneqarnissaa Siumumiit inassutigaarput, UPA2015-imi Inatsisartut Suleriaasiata allangortinneqarnera pillugu Inatsisartut Siulittasoqarfiata siunnersuutaa imm. 148 innersuussutigalugu, matumani eqqartorneqartut Siulittasoqarfiup sukumiisumik mianerisassallu mianeralugit imm. 148-umut ilanngullugit eqqartussagaat innersuullugu.

Jens Immanuelson
Siumut